

KOLOSIY

Pol Kolosiy Biynimb Kuyip Minj Tikak

Minim Nind Niņep

Biynimb gunap minim tep ak aņņek Kolosiy biynimb Krays nup chingyak. Kisen Pol kuyip kond mindiy minim aņņirep giyingip. Pen bi Gor minim aspun aņņiy yesek aņņyak gunap, Kolosiy biynimb Krays ker mindeyak gok kuyip aņņyak, “Gor ker mindniņg, kumbak tikiy, tap niņemb tap gok asikrep giy, tap yesek okok aņņniņnimimb aņņyak.”

Kun aņņey, Pol minj biy tikyokiy aņņak, Krays nep tap okok maņņiysek gayek mindip ak mey, tap yikop yesek okok ma aņņniņnimimb. Krays nep chinup di Nop yip jimniy aynimuņ rek mindip ak, nup nep aņņniņnimimb aņņiy minj tikiy aņņirep gak.

Minim Ar Keykey Mindip Rek:

Minim nind aņņak ak mindip, chapta 1:1-8.

Krays nep Biyomb yimb. Nuk nep biynimb gok kuyip di Nop yip jimniimuņ rek mindip aņņak minim ak mindip, chapta 1:9–2:19.

Gor gek Krays biynimb nuk aypim ak; monmon giyingipim rek ma ginimimb aņņak minim ak mindip, chapta 2:20–4:6.

Minim aņņ day jiwning aņņak minim ak mindip, chapta 4:7-18.

1 1-2 Yand Pol. Bapiy Gor yip niņen aņņek, bi Jiysis Krays nup minim dand amemb ak mindpiyn. Pen miņiy mam chin Timotiy yip mindiy, nimb biynimb Krays nup chingrep gipim gok minj tiksipur.

Bapiy Gor, nimbip mam ay Kolosiy mindpim gok simb niņiy, kond mindrep ginimuņ.

Pol Gor Nup Lotiw Giy Tep Aņņak

3-4 Pen chir minim bap niņbur ak, nimbip apay, “Jiysis Krays nup gosimb niņiy, biynimb nup gok maņņiysek wasemb aypay apay.” Kun

anġey, chir niñiy, per Biyomb chin Jiysis Krays Nop nup, nimbip nen anġniñiyiñg, tep apur. ⁵Yenen: Jiysis Krays minim tep yipul yimb ak, miñmon nimbip okok amek dipik ak mey, chinup simb niñiy dip rek, direp giniñgamb miñmon nuk biyoñ anġiy, niñrep giy gos sek kond mindpim.

⁶Pen minim tep kun ak miñmon nimbip okok nep ma dand ambay; miñmon okok kind kind amjap. Amnakniñ mey, kiyk kunep niñiy, miñ tep gipim rek ak gispay.

⁷Bi tep chin Epapras, woñg yand gipiyn rek giyiñg, nimbip Krays minim tep anġniñimb ak, biy apiy anġak, ⁸“Gor Kawnan ak kiy yip mindakniñ, Krays biynimb nuk gunap kuyip wasemb appay anġak.”

Pol Gor Nup Anġniñiy Anġak, Nand Gey Nip Chiñgrop Giniñiy Anġak

⁹Anġek, Timotiy chir niñiy, nimbip nen Gor nup per anġniñbur. Pen chinup tep giniñgamb ak mey, Gor Kawnan ak nimbip gos tep yimb ñonimuñ, niñrep giy, gos nuk ñiniñgamb ar ak nep giniñgambim.

¹⁰Nimbip gos tep kun ak ñek, Gor miñ tep nup ak niñrep giy mey, Biyomb chin anup tep giniñgamb ar ak gem amniñgamb. ¹¹⁻¹²Pen Biyomb yimb ak nimbip kond mindek, miker gunap apek gos kun ak ma niñiy, chinup dek biynimb nuk mindpun anġiy gos sek mindiy, nup tep anġyiñg nep mindenimimb. ¹³Seytan, bi kisyim kind okok ken mindip ak, chinup tiwniñg wos yimb giyiñgip ak pen; Gor Ñi tep nuk ak chinup wisik yokek, miñiy biynimb nuk mindiy, melik kind okok ken mindpun. ¹⁴Nuk nep mey, chinup nen kumiy, tap siy tap timey ginuk gach ak wiykyokak.

Gor Ñinuk Biyomb Yimb

¹⁵Nop Gor nup miseñ niñjun rek ma ayip ak pen; Ñinuk mey Nop rek mindip. Biynimb tap okok mañgiysek kayañ rek mindip; Jiysis nuk koyoñ mindiy mey, tap kun gok mañgiysek kond mindip. ¹⁶Tap semb biyoñ, man biy; tap windin niñbun gok, windin ma niñbun gok; enjol, Seytan, chip kawnan, chipday, malñiluk, kichekiy tap okok mañgiysek nuk nep gayak. Gayak kun ak yimb nuk araniñgamb. ¹⁷Miñmon ma alwol gayak ñin ak, nuk mindek. Miñiy nuk yip jimñiy, biynimb tap yerip okok mindrep giniñgamb. ¹⁸Nuk jun won rek mindamb, chin biynimb nuk gok, ñin kind tomb kind nuk gok rek mindpun. Nuk kiñiñ giy kumiy tip tikjakak ak mey, tap yerip yerip mindip gok kayañ rek mindip; nuk Biyomb yimb koyoñ mindip. ¹⁹Yenen: Gor gos nuk key niñiy gek, Ñinuk nundkaw rek nep mindiy, ²⁰mon kiros bak biyoñ likañ yapek kumiy, biynimb akañ, tap yerip yerip semb biyoñ man biy mindip gok, Gor yip jimñinimuñ rek ayip.

²¹Nimb nind tap siy tap timey giy, paryomb okok rek mindiy, Gor biynimb ñanġep nuk mindyiñgipim. ²²Miñiy pen Ñinuk kumak rek,

nimbip di jimñiy ayek, Gor niñek minim bap ma mindip; biynimb suñ-tep nuk gok mindpim. ²³Pen nimbip diniᅅgamb minim tep ak ma kirgiy, direp gipim rek di mindiy, nup pisnep chiᅅgiy gem amniᅅgamb ak; biynimb tep nuk anep mindeniᅅgambim. Minim tep nimbip aᅅgey niᅅbim kun ak, nimbip nep mer, biynimb miñmon okok kind kind aᅅᅅney amnak. Yand Pol kunep woᅅg ar kun anep gipiyn.

Pol Kolosiy Biynimb Kuyip Woᅅg Giñak

²⁴Yand nimbip nen woᅅg kun ak gen yip kalambis aypay ak, minim ma mindip; Krays chinup diniᅅg, yiwur yomb yimb ak diy kumak. Kun ak chin kiñiᅅ nokom mindpun rek, yand biynimb nup ker mindpay gok kuyip, woᅅg aᅅgayak rek giy miker diniᅅgayn ak, minim ma mindip.

²⁵Gor nep yip aᅅgek, nimbip biynimb Krays ker mindpim gok, direp giniᅅg minim tep nup ak aᅅᅅniᅅrep gipiyn. ²⁶⁻²⁷Minim teprep kun ak ma niᅅyiᅅgipay ak pen; miñiy Gor gos nuk key niᅅiy, biynimb nup ker gok gos ñek; Krays chin yip nep mindeniᅅgamb rek, chin am nuk yip mindrep giniᅅgambun minim ak niᅅrep giy mey, yip aᅅgek nimbip biynimb Jiwda mer gok sesek aᅅᅅniᅅmbun. ²⁸Kun ak mey, biynimb okok monmon, Krays biynimb tep nuk mindey, Gor ñin ar ak ayjun aᅅgiy, kuyip minim yipul kun ak aᅅᅅniᅅrep gipun. ²⁹Ar kun ak nep, Gor yip kond mindakniᅅ, kilis giy woᅅg gi mindpiyn.

Nimbip Minim Yesek Aᅅᅅniᅅgiy Ak Ma Dinimimb

2 ¹Nimb Kolosiy biynimb gok diy, Leyodiysiya biynimb gok diy, biynimb jomluk yip ma niᅅbim gok diy mindrep ginimimb aᅅgiy, woᅅg kilis giy gipiyn. ²Kun ak nimb maᅅgiyseᅅk gos sek mindiy, penpen wasemb ay, gosimb tep niᅅiy mey, minim tep ma niᅅyiᅅgipay ak niᅅrep yimb giniᅅgambim. Minim nind ma niᅅyiᅅgipay kun ak mey, Krays minim tep ak nep. ³Gos timund teprep ak nuk yip mindip. Biynimb nup chiᅅᅅniᅅgambay gok gos tep ñek, Gor gosimb tep nup ak niᅅrep giniᅅgambay.

⁴Pen biynimb gunap tom giyiᅅg, minim tep ar ak aspun aᅅgey, minim yesek kiyk ak niᅅnimimb rek ayip ak; nimbip aᅅᅅrep gispiyn. ⁵Yand miñmon paryomb biy mindpiyn ak pen, gos yand ak nimbip ker amnakniᅅ, niᅅyiᅅg mindpiyn. Pen nimb Krays nup gosimb niᅅyiᅅg, jimñiy mindpim ak, yip tep gip.

Minim Yesek Ak Ma Dinimimb

⁶Nimb Jiysis Krays nup gosimb niᅅiy, Biyomb chin aᅅgiy niᅅbim ak mey; ar kun ak nep niᅅiy gem amnimuᅅ. ⁷Nup chiᅅᅅrep giy, minim niᅅind yimb nimbip aᅅᅅneyak dipik ak direp giy, Gor nup tep aᅅyiᅅg nep mindenimimb.

⁸Pen niṅrep ginimimb. Biynimb gunap nimbip, Gor nup gosimb ak niṅbim ar ak kirgiy, gos chin niṅbun ar ak niṅyaṅ aṅgiy, nimbip nembnemb gi dand kind kiyk okok amey, minim tep ak tip niṅun aṅgiy kosyam niṅnimimb rek ayip. Yenen: kiyk Krays minim yipund giy ak ma apay; biynimb aṅṅiṅgiy ar ak niṅiy, Seytan layn nuk miseṅ ma niṅbun gok minim ak apay. ⁹Krays mumbwak sek ak pen, Gor mindip rek yipund giy yimb mindip. ¹⁰Nuk nep gek nup chingiy, Gor biynimb nuk yipund giy yimb mindipim. Nuk nep mey, Biyomb yimb. Biynimb yomb, enjol yomb, tap simbongipay yomb gok maṅgiysek beṅ nup okok mindpay.

¹¹Nimb Krays nup diy mey, mindyṅgipim rek ma mindpim: key yimb mindpim. Chin Jiwda biynimb kumbak tikyṅgipun gok, biynimb tep kun gok key mindonjun aṅgiy tikyṅgipun ak pen; nimb key yimb mindpim ak, biynimb gey kun giy ma mindpim; Krays nep gek kun giy mindpim. ¹²ṅing pikpik ak, Krays yip kumiy tip tikjakpun aṅgiy ṅing pikpik. Pen Gor bi kilis kun ak key yimb. Nuk Jiysis Krays nup gek tip tikjakak rek, chinup kunep gek, biynimb kim kisenimb mindpun.

¹³Nimb nind tap siy tap timey ar anep giy, Gor yip minim aṅṅ amiy apiy ginimimb rek ma mindek, pisnep kumnimimb rek ayak ak pen; nuk gek Krays yip mindiy kim mindpim. Tap siy tap timey ginuk ak niṅiy kirgak ak mey; ¹⁴minim keykey buk yomb biyaṅ tikayak ak wiyyokak. Minim keykey timbrikonuk, minim yomb mindek ak pen; nuk dam mon bak biyoṅ Jiysis yip sesek ayek kumak. ¹⁵Kun gak rek, Seytan sek, kichekiy malṅiluk tap yerip nup marik gipay gok sek wiyniy gek, pisnep apyap pikyak.

Krays Kumiy Tikjakak Rek Kim Mindonṅambun

¹⁶Kun gak rek, nimb ṅing akaṅ tap gunap okok ṅimbem, biynimb gunap nimbip aṅṅ sikoy ma giniṅgiy. Takin kisen wip ṅin ak, ṅin yomb aṅgiy asikṅṅambay akaṅ; Jiwda lotiw ṅin yomb aṅgiy asikṅṅambay akaṅ; ṅin yerip yerip asikṅṅambay ak; kindik ma gem nimbip aṅṅ sikoy geniṅgiy, gos kuṅay ma niṅnimimb. ¹⁷Krays ma awak ṅin ak, low minim kun ak kawnan rek niṅiy giyṅgipay ak pen; miṅiy Krays bi nonim ak pisnep miseṅ wip ak, minim kun ak rek nimbip ma aṅṅniṅgiy.

¹⁸Kun ak biynimb gunap biynimb yomb mindpun aṅgiy, tom giy aṅṅniṅambay, “Day niṅbun rek, chin enjol beṅ okok mindiy, kuyip lotiw gipun aṅgey,” minim kuyip ak ma dinimimb. Ak gos kiyk key niṅbay rek tom giniṅambay. ¹⁹Biynimb kun gok, Biyomb Jiysis Krays nup kirgiy mey, ar kun ak ambay. Pen nuk, Biyomb chin ak mey; chin biynimb nup ker mindpun gok di jimṅiy ay, kond mindiy kilis ṅamb, Gor nup tep gip ar ak gon amimb. Kun ak nuk jun won rek ak mindakniṅ, chin ṅin kind tomb kind nuk gok rek mindiy, kindiy yimṅi wos gakniṅ, mindrep gipun.

²⁰Krays ker mindpim ak, nuk yip kumnimbik rek ayip ak mey; Seytan layn nuk; kichekiy, chipday tap gok nimbip tiwning ayiŋgipay miñ wos ak, pisnep pungrikip. Kun ak yenen biynimb yikop gok gos niŋbay rek niŋiy gi mindpim. Minim kilrimey nimbip apay kun ak: ²¹“Tap ak ñin maŋgiy ma dinimimb,” “Tap ak ma ñimb niŋnimimb,” “Tap ak ma diniŋnimimb apay” ak, ²²minim rek ma ayip. Tap kun gok ñimbun akan, yergon, tap yikop rek ayip. Minim kilrimey aŋñimbay kun ak, biynimb gos key niŋiy apay ar ak nep aŋñimbay.

²³Biynimb kun gok Gor nup ma chiŋgipay rek, lotiw yesek, gos kiyk key niŋbay rek giyŋg, biynimb simbgeprek mindon tep giniŋgamb aŋgiy, tap asik mosik giy, kosyam mindpay. Kun gey, biynimb gunap niŋey, niŋind gispay rek ayiŋgamb ak pen; tap timey gep gos ak apek, Gor yip ma mindpay rek, tap bap kilis ñek, mindrep giniŋgiy rek ma mindip.

Gor Chinup Gek Krays Yip Tikjagnuk Rek Ayip

3 ¹⁻²Pen nimb Krays yip, tip tikjakiy kim kisenimb mindpim ak, man ar biy tap gok gos ak ma niŋnimimb. Gos yomb nimb ak amnimuŋ; Krays semb biyoŋ amiy, Nop ñin yipund kind okok ken mindiy, chinup kond mindip ak nup. ³Nimb Krays yip kumbik rek ayip ak mey; per mindeniŋgambim junj ak, kiy apiymiŋay yip mindip. ⁴Kun ak chin perper mindeniŋgambun junj ak mey, Krays. Kisen nuk winiŋgamb ñin ak, am nuk yip mindrep giniŋgambun.

Nind Mindyiŋgipim Ak Key: Miñiy Key Mindpim

⁵Krays yip kumbik rek, nuk yip mindnep mindeniŋgambim ak; monmon ma ginimimb. Biyn siy bi siy ma giy, timey ma giy, biynimb gunap tap kuyip gok yip rek mindombikop aŋgiy, gur-maniy tap gok nep dun aŋgiy ma gem amnimuŋ. Pen ar kun ak gem, biynimb tap yesek gunap aŋgniŋun aŋgiy, Gor nup kirpay rek ak giniŋgambim. ⁶Ar kun gok gey, Gor nup tep ma gip rek, yiwur yomb diniŋgambay. ⁷Nimb biynimb yikop mindyiŋgipim ñin ak, tap timey ar kun ak nep gos niŋiy giyiŋgipim. ⁸Pen miñiy biynimb Krays ker kim kisenimb mindpim ak; nind miluk niŋiy, kalrimey jiwiy, penpen aŋgiy, minim timey aŋgiy, biynimb gok kuyip aŋg sikoy giy, wasik aŋgiy giyiŋgipim rek ma ginimimb. ⁹Minim yesek aŋgiy, pen aŋgek pen aŋgek giyiŋgipim ak, kunep ma aŋgnimimb. ¹⁰Krays yip kumbik rek ayip kun ak, timey giyiŋgipim miñ nimbip kom kom gak ak, nuk chech wor ayip band rek ak tuŋgasik yokak. Tuŋgasik yokiy, kim kisenimb bap rek ayñak ak mey, miñiy gos nup ak niŋrep giyŋg, kim kisenimb rek ayiŋg, Biyomb tap maŋgiysek gayak ak mindip rek mindniŋ gispim. ¹¹Chinup kun gip rek, Jiwda biynimb gok key, Jiwda biynimb mer gok key ma mindpun. Biynimb kumbak tikpay gok key, biynimb kumbak ma tikpay gok key ma

mindpun. Biynimb taw dam ayey woŋg yikop giñimbay gok key, biynimb gos key niŋiy woŋg gipay gok key ma mindpun. Biynimb riyt rayt gipay gok key, biynimb riyt rayt ma gipay gok key ma mindpun. Chin maŋgiysek kim kisenimb rek ay, Krays Biyomb chin ak yip nep mindpun.

Biynimb Simb Niŋep Miñ Ar Ak Ginjun

¹²Kun ak Gor nimbip diy, biynimb suŋ-tep yand aŋgiy, wasemb ay mindip ak; yimb nimbik key ma dand aranimb. Biynimb sayn tep nuk gok mindiy, biynimb gok kuyip simb niŋiy, direp giy, nimbip timey geniŋgiy miluk ma niŋnimimb. ¹³Biynimb Krays ker mindpay gunap, nimbip timey rek geniŋgiy, gos kun ak ma niŋnimimb. Minim gunap mindonimuŋ; Biyomb ak nimb timey gem niŋiy kirgak rek, kuyip kunep niŋiy kirginimimb. ¹⁴Pen tap yomb yimb ak, biynimb wasemb aynimimb. Kun gem mey, minim gunap ap ar kun ak jimñiniŋgamb.

¹⁵Krays nimbip kond mindip nen, gos yomb ma niŋnimimb. Biynimb yand gok jimñiy mindiy, mindrep giniŋgambay aŋgiy, nimbip dek jimñiy mindpim ak, gos gunap ma niŋnimimb. Gor nup tep aŋgyiŋg nep mindenimimb. ¹⁶Krays minim tep ak, namb nimbip biyaŋ aranjakiy rek mindonimuŋ. Minim nup ak niŋrep yimb giy mey, penpen aŋñirep giyiŋg, Gor nup yimb dand aranemb kamep saŋ salik gunap, Baybol buk “Sam” apay gunap aŋgyiŋg mindenimimb. ¹⁷Pen minim aŋgning akan, yerer giniŋg, Biyomb Jiysis ker mindpun aŋgiy, kuyip apiymiŋay tep aŋgyiŋg gem amnimuŋ.

Biynimb Jiysis Ker Mindpay Gok Mindrep Giniŋgiy

¹⁸Krays ker mindpun ak, nimb biyn gok Biyomb chin ak nup tep ginimuŋ aŋgiy, naŋgumiy sikop minim aŋgningiy ak kindik ginimimb.

¹⁹Pen nimb bi gok, biyn nimb gok kuyip minim kilis giy ma aŋgnimimb; kuyip wasemb aynimimb.

²⁰Pen nimb ñapan gok, nap nanim aŋgningiy rek niŋdinimimb. Kun geniŋgambim mey, Biyomb chin anup tep giniŋgamb.

²¹Pen nimb nop sikop, ñapan nimb gok kuyip minim kilis giy aŋgem aŋgem, gos timey niŋiy, mind tep ma giniŋgiy rek ayip ak; niŋrep ginimimb.

Biyomb Gok Sek, Bi Woŋg Giñimbay Gok Sek

²²Nimbip biynimb kalambis rek ay dand amey, biyomb gunap kuyip woŋg yikop giñimbim gok; niŋmindyakniŋ won anep woŋg gon, kuyip tep ginimuŋ aŋgiy, ma ginimimb; Biyomb chin semb biyoŋ ak niŋmindip rek, girep gun aŋgiy, tep gakniŋ ginimimb. ²³⁻²⁴Nuk nep nimbip direp giniŋgamb ak mey; tap yerip yerip ginimimb okok, biyomb man ar biy gunap niŋey tep gaŋ aŋgiy ma ginimimb; Biyomb semb biyoŋ anup woŋg

gispun angiy ginimimb. Wong giñispim ak; Biyomb semb biyoŋ anup giñispim. ²⁵Pen Gor nuk biynimb timey giniŋgambay gok kor niŋning; biynimb yomb gok, biynimb sikoy gok angiy, ma kor giniŋgamb; ar nokom giy, yiwur ñiniŋgamb.

4 ¹Kun ak nimb biyomb rek mindpim gok, Biyomb nimb semb biyoŋ mindip anup pirikiy, bi nimbip wong giñimbay gok kuyip kond mindrep giy, tap kuyip ñemb rek ak monmon ñinimimb.

Gor Nup Angniŋyiyŋ Mindrep Ginimimb

²Kolosiy biynimb. Gor nup angniŋyiyŋ nep mindenimimb. Gos sek mindiy, Gor nup angniŋyiyŋ, tep angiyŋ mindenimimb. ³Chinup kunep Gor nup angniŋ mindem, kinjeŋ yomek, Krays biynimb miñmon okok kuyip kunep diniŋgamb minim tep ak; angniŋyiyŋ nep mindenjun. Minim kun ak nep aŋgen, yip kalambis ayeyak mindpiyn. ⁴Pen nup angniŋem, yip kond mindakniŋ, minim kun ak aŋgrop gen, biynimb niŋrep giniŋgiy.

⁵Pen nimb biynimb Krays ker ma mindpay gok kuyip aŋgrop gem, Gor nup gosimb ak niŋningiy. ⁶Gor nimbip kond mindakniŋ, meŋg miŋgan nimbik ak sol yindik rek ayonimuŋ; nimbip minim yerip rek angniŋeniŋgambay, kuyip angniŋirep yimb giniŋgambim.

Pol Tikiykas Yip Oniysmas Yip Kuyip Yokak

⁷⁻⁸Mam tep Tikiykas, wong yand gipiyn rek gip anup, yoken jap. Mindpim ak amiy, yand yergiy rek mindpiyn ak nimbip angñek niŋiy, miñmiñ gim angiy yoksiyiyn. ⁹Pen mam tep Oniysmas, bi nimbik key ak yip niniŋgayr. Amiy, tap yerip yerip akniy gisap ak maŋgiysek, nimbip angniŋirep giniŋgambiy.

Pol Minim Aŋg Day Jiwak

¹⁰Bi Ariystakas, yand yip kalambis mindpur ak sek, bi chin Mak sek nimbip, “Mindpim?” apiyr. Mak mey, bi chin Banabas numind nuk ak. Bi kun anep nind minim yokiy aŋgnik, “Nup kayaŋ ak amjakek dinimimb aŋgnik.” ¹¹Bi chin Josiwa yimb nup bap Jastas apay ak kunep, nimbip, “Mindpim?” aŋgip. Bi chin omiŋal nokom kun ak kuyipyakam niŋen yip tep gip. Yenen: Jiwda gunap yip gosow gosow niŋiy jimñiy ma wong gipun; kiykyakam nep yand yip, Gor biynimb diy kond mindeniŋgamb minim ak angñimbun.

¹²Bi nimb Epapras, Jiysis Krays nup wong gip ak, nimbip, “Mindpim?” aŋgip. Nuk per nimbip Gor nup angniŋiy aŋgip, “Kiyk gos gunap ma niŋiy; nip chingrep yimb giy, niŋrep yimb giy, apan rek nep gey amnimuŋ aŋgip.” ¹³Yand nup niŋbiyn; nuk kilis giy nimbip wong giy, Leyodiysiya biynimb kuyip wong giy, Hiyrapoliys biynimb kuyip wong giy gip.

¹⁴Pen Demas yip, bi tep yand dokta Luk yip nimbip, “Mindpim?” apiyr.
¹⁵Leyodiysiya kay Krays ker mindiy mam ay apun gok, biynimb ap biyn Niympa korip lotiw apay gok maŋgiyse, “Pol nimbip, ‘Mindpim?’ aŋgip aŋgnimimb.”

¹⁶Nimbip minj yoksiyiyn biy niŋiy, ñem amek, Leyodiysiya biynimb Krays ker mindpay gok kunep niŋniŋiy. Pen Leyodiysiya biynimb kuyip minj yokpiyn ak, nimb kunep diy niŋnimimb.

¹⁷Pen Akiypas nup aŋgnimimb, “Biyomb woŋg nip aŋgak ak gi dinimin aŋgnimimb.”

¹⁸Yand Pol, miñiy ñin maŋgiy yand ak key, minim day won biy tiksipiyn. Yip sen diy miñ wos aypay ak, yip sakiy ma ginimimb. Gor nimbip kond mindonimuŋ.